

# Main purs, main manaschis e dapli gudogn

Conclusiuns dal nov rapport da l'Uffizi federal d'agricultura

MARTIN CABALZAR/FMR

■ **Il nov rapport da l'Uffizi federal d'agricultura dat ina vasta survista davart ils impurtants svilups da l'agricultura svizra ed el porscha ina buna analisa davart da la situaziun actuala e vegninta.** Tranter auter s'occupa il rapport era dal nivel da furmaziun da las puras e dals purs. Plinavant documentescha il rapport daco che il dumber d'animals è sa reduci en il decurs dals ultims onns ed infurmescha co l'uffizi federal responsabel s'engascha sin plaun internaziunal per in sistem da vivonda persistent. La publicaziun che cuntogna ina vasta paletta da temas è uss er accessibla online sut [www.blw.admin.ch](http://www.blw.admin.ch)

## Main purs e dapli gudogn

Il dumber dals manaschis purils sa reducchia vinavant. 2019 dumbrava la Svizra anc rodund 50 000 manaschis. Quai èn 1.6 pertschient damain che l'onn precedent. Ils purs svizzers cultiveschan ina surfatscha da 1.044 milliuns hectaras, la grondezza media munta a 20.9 hectaras per manaschi. Era il dumber da las persunas engaschadas en il puesser tschessa vinavant. 2019 eran quai anc 150 100 persunas, in minus da 1.5 pertschient en cumparegliaziun cun l'onn precedent, u schizunt 53 700 persunas pli pauc che l'onn 2000. Creschidas èn dentant las entradas purilas l'onn 2019 e quai per 5 pertschient en cumparegliaziun cun l'onn precedent, u en la media per 3600 francs sin 74 200 francs per manaschi.

Tenor il quint statal 2019 ha la Confederaziun impundi l'onn passà radund 3.7 milliardas per l'agricultura. Quellas èn restadas relativamain constantas ils ul-



In nov Rapport agrar da la Confederaziun dat ina buna survista dal svilup da l'agricultura svizra.

FOTO MAD

tims onns. Ellas muntan a rodund 5.1 pertschient da las expensas totalas da la Confederaziun.

## Il dumber dal muvel tschessa

Per in sectur da la tratga da bestga armentiva vegn il rapport a la suandanta conclusiun: Considerond il dumber d'envernantas da bestga, constatescha il rapport ch'il dumber total da la bestga armentiva è tschessà per quatter pertschient dapi la midada dal tschientaner. In'exceptziun da questa tendenza negativa èn giaglinas e chauras. Sa reducids marcantamain en connex cun la midada da structura dals ultims 20 onns è il dumber d'elevaturs d'animals da niz. Tar ils purs da bestga èn quai in minus da 30 pertschient, tar ils elevaturs da pors schizunt in minus da 60 pertschient e tar ils possessurs da giagli-

nas in minus da 35 pertschient. 2019 devi en Svizra anc 34 000 manaschis da bestga armentiva, radund 5800 farmas da pors e bun 13 300 farmas da giaglinas.

## Purs han meglra furmaziun che puras

L'evaluaziun fatga pertutgant il sectur social da l'agricultura mussa che ina terza dals purs disponan en Svizra d'ina furmaziun professiunala superiura, entant che quai è il cas mo tar 15 pertschient da las puras. Ina cumparegliaziun cun ils mastergnants mussa che radund ina quarta dals umens ed in tschintgavel da las dunnas engaschadas en il sectur secundar han ina furmaziun pli elevada. L'analisa demussà ch'ina quarta da las dunnas che èn occupadas en l'agricultura han absolvi sulettamain la scola obligatorica e ch'ellas na dispo-

nan consequentamain betg d'ina furmaziun professiunala correspondent. En il sectur da mastergn è questa cun radund 10 pertschient marcantamain pli bassa. Sin fundament da questa constataziun vegn il rapport a la conclusiun che la furmaziun professiunala da las puras stoppia vegnir megljerada.

## Transfarmaziun dals systems da nutriment

Il rapport agrar 2020 infurmescha er davart la situaziun sa midada dals systems da nutriment internaziunals che vegnan confruntads cun las sfidas globalas sco midada dal clima, fomez e perdita da la biodiversità. Medemamain quitads fa che mo radund duas terzas da las victualias che vegnan producidas vegnan era consumadas. Il rest va a mal resp. vegn s'furlattà. En vista a questas sfidas ha la ONU annunzià da vulair organisar en il decurs dal 2021 in inscunter suprem davart systems da nutriment persistentes. La Svizra che s'engaschia gia dapi onns per promover tals systems possia contribuir essenzialmain per schliar questa problematica globala, scriva l'uffizi. Sco entruidament per questa tematica ha l'Uffizi federal d'agricultura organisà a la radunanza annuala dal Forum economic mundial FEM che ha gi lieu il schaner 2020 a Tavau in dialog cun persunalitads decisivas en la politica, en l'economia ed en la societad civila davart la tematica «Investing in Food Systems Transformations».

**Ina vasta paletta da tematicas davart la politica agrara da la Svizra po vegnir consultada sin la plattform d'internet [www.agrarbericht.ch](http://www.agrarbericht.ch). Là datti er ina resumaziun dal rapport agrar sut «Agrarbericht 2020 kompakt».**